



**Komunikadu Imprensa**  
**Tribunál Judisiál Primeira Instánsia Baukau**  
**07 Novembru 2024**

**Aplikasaun artigu 215 Kódigu Prosesu Penál kona-ba estinsaun la relevante  
iha kazu Violénsia Doméstika**

Iha 28 Outubru 2024, JSMP observa Tribunál Judisiál Primeira Instánsia Baukau, prezide julgamentu produsaun prova ba kazu ofensa ba integridade fízika simples ho natureza violénsia doméstika ne'ebé iha relasaun ho kestaun estinsaun ne'ebé envolve arguidu MSBL hasoru nia feen, iha Munisípiu Vikeke.

Prokuradór akuza katak iha 05 Janeiru 2023, iha oras tuku 23:00 kalan, arguidu basa dala ida iha ofendida nia hasan parte loos, tebe dala rua iha ofendida nia ain-kabun rezulta ofendida monu hodi kona iha tali kelen ne'ebé kroat. Antes ne'e, arguidu ho ofendida diskute malu tanba diskonfia ofendida manda mensajen ba mane seluk liuhosi WA.

Iha okazisaun seluk ne'ebé la apura loron akontesimentu, maibé maizumenus iha tinan 2020, arguidu basa dala ida iha ofendida nia matan laran.

Prokuradór akuza arguidu komete krime konkursu rua kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3, 35(b) no 36 LKVD.

Iha prosesu julgamentu depoisde rona tiha arguidu ninia deklarasaun, tribunál kontinua rona ofendida nia deklarasaun no ofendida konfirma faktu ne'ebé akontese iha 05 Janeiru 2023 no konfirma mós faktu ne'ebé akontese iha tinan 2020.

Depoisde rona tiha konfirmasaun ofendida nian ba faktu hotu, tribunál informa ba ofendida katak krime ne'ebé akontese iha tinan 2020, bazeia ba artigu 215 Kódigu Prosesu Penál kona-ba direitu atu halo keixa nia estinsaun liu ona, tanba bazeia ba artigu ne'e prazu ba hato'o keixa ne'e iha fulan neen (6) de'it.

"JSMP entende katak kestaun estinsaun la relevante iha kazu sira ho natureza violénsia doméstika no so bele aplika de'it ba kazu ne'ebé ninia natureza semi públiku, tanba violénsia doméstika konsidera hanesan krime públiku, nune'e ninia prosesu la depende ba keixa", dehan Sr. Casimiro dos Santos, Diretór Ezekutivu Interinu JSMP.

JSMP enkoraja tribunál atu asegura interpretasaun ida uniforma ba kazu sira ho natureza violénsia bazeia ba jéneru, atu iha entendementu ida hanesan entre juis sira, nune'e la fó impaktu negativu ba ofendida. Defaktu comunidade no ofendida mai hosi área remotas la iha koñesementu adekuada no la dun kompriende kona-ba kestaun teknika prosesu hirak-ne'e, nune'e ho interpretasaun no esplikaun ne'e, bele prejudika sira nia direitu no iha tempu hanesan bele hamihis sira ninia konfiansa ba iha prosesu formál.

Kazu ne'e rejistu iha tribunál ho Nú.Prosesu: 0001/23.VQWTL no julgamentu ne'e prezide hosi Juis Singulár, Dra. Albertina das Neves no Prokuradór Representa hosi Dr. Julio da Silva no arguidu hetan Defeza hosi Dr. Antonio Fernandes hosi Defensória Públiku.

**Atu hetan informasaun kompletu favor kontaktu:**

Casimiro dos Santos  
Diretor Ezekutivu Interinu JSMP  
Diresaun e-mail: [casimiro@jsmp.tl](mailto:casimiro@jsmp.tl)  
Telefone: (+670) 33238883/77257466  
Website: <https://jsmp.tl>  
[info@jsmp.tl](mailto:info@jsmp.tl)